

- केन्द्र सरकार हर रहवासी ताई न्याय री पहुंच बत्ती सरल अर मजबूत करण सारू दिशा टू पॉइन्ट ओ ने मंजूरी दी- ई योजना ने पांच साल ताई लागू करी जायेला।
- मुख्यमंत्री भजन लाल शर्मा नीति आयोग रा सदस्य के.वी. राजू रे साथै बैठक कर ने जिला आधारित विकास मॉडल माथे चर्चा करी।
- राज्य सरकार समान नागरिक संहिता-यूसीसी माथे विधेयक बणावण सारू उच्च थर री समिति बणायी।
- चिकित्सा मंत्री गजेन्द्र सिंह खींवर कहयो-कोटा-बीकानेर अर जोधपुर प्रसूता मामला न्यारा-न्यारा है-इण ने एक दूजां रे साथै जोड़ ने नी देख्या जावणा चाहिजे।

000

केन्द्र सरकार दिशा टू पॉइन्ट ओ योजना ने मंजूरी दे दी है। अ कार्यक्रम ई साल पैली अप्रैल ऊँ 31 मार्च 2031 ताई पांच साल रा बगत सारू नुवा रूप मांय लागू कर्या जायेला। 255 करोड़ रिप्यां रा रोकड खर्च वाळी ई योजनां रो मकसद हर रहवासी ताई न्याय री पहुंच सरल अर मजबूत बणावे है। आ देश रा 16 सतत विकास लगस री प्रतिबद्धता ने आगे बधावा है इण ऊँ विकसित भारत 2047 रा विजन ऊँ ई जोड़ी ज्या है। केन्द्रीय कानून मंत्री अर्जुनराम मेघवाल मुजब दिशा टू पॉइन्ट ओ मांय प्रौद्योगिकी सक्षम न्याय वितरण सारू विधि संजीवनी नाम रो नुवो घटक पेश करी ज्यो है। टेली-लॉ री मार्फत ग्राम पंचायत थर माथे वीएलई कानी ऊँ ढाई लाख सामान्य सेवा केन्द्रां ऊँ सगळा लोगां ने मुकदमां ऊँ पैला मुफ्त कानूनी सलाह दी जायेला। साथै ई कानूनी जागरूकता अर साक्षरता सारू ऑन लाइन अर ऑफ लाइन अभियान चलाया जायेला।

000

नुवी दिल्ली मांय ब्रिक्स रा राष्ट्रीय सुरक्षा सलाहकारां एन.एस.ए री आज मीटिंग व्ही। दो दिन री ई बैठक री सदरत राष्ट्रीय सुरक्षा सलाहकार अजीत डोभाल कर रिया है। इण मांय समूह रा 11 सदस्य देशां रा सुरक्षा प्रमुख हिस्सो ले रह्या है। आ देशां मांय भारत, ब्राजील, चीन, मिस्र, इथियोपिया, इंडोनेशिया, ईरान, रूस, सऊदी अरब, दक्षिण अफ्रीका अर संयुक्त अरब अमीरात भेळा है। अबार मांय गैर पारम्परिक सुरक्षा चुनौतियां बैठक रो खास मुद्दो है। इण मांय राष्ट्रीय सुरक्षा रा खतरां ऊँ तेजी ऊँ बदलता सरूप अर उभरता हिफाजती जोखिमां मांय नुवी तकनीक री भूमिका माथे चर्चा करी जावे।

000

मुख्यमंत्री भजन लाल शर्मा आज नीति आयोग रा सदस्य प्रोफेसर के.वी. राजू री मौजूदगी मांय वठे रा अहलकारां रे साथै मीटिंग करी। मुख्यमंत्री रहवास माथे व्ही ई बैठक मांय विकसित राजस्थान रा संकल्प ने पूरो करण सारू जिलां आधारित विकास मॉडल माथे बतळ करी ज्यी। इण रे तैत हर जिला मांय आकांक्षी उपखण्डां ने जोडता वठा री जरूरतां अर संसाधनां मुजब विकास योजनावां बणावण री बात कही ज्यी। इण ऊँ माली गतिविधियां री रफ्तार बध सकेला साथै ही स्थानीय थर माथे रोजगार अर निवेश रो मौको मिलेला।

000

जंगळात मेहकमां रा मंत्री संजय शर्मा सीएसआर निवेश ऊँ संरक्षित वन हलका मांय विकास माथे जोर दियो है। श्री शर्मा आज सर्वाईमाधोपुर मांय राज्य थर री सीएसआर कॉन्क्लेव रा उद्घाटन सत्र मांय बोल रह्या हा। वणा कहयो के जंगळात मेहकमा अर कॉर्पोरेट हलका री साझेदारी ऊँ वन्य जीव संरक्षण जैव विविधता अर इको ट्यूरिज्म माथे चोखो काम कर्यो जा सके है। दो दिन रा इ कॉन्क्लेव मांय राज्य रा संरक्षित जंगळात हलका मांय सीएसआर री मार्फत कर्या जावण वाळा कामां माथे चर्चा करी जावे।

000

राजस्थान एटीएस जयपुर ऊँ जैश-ए-मोहम्मद ऊँ कथित रूप ऊँ जुड़ी एक महिला ने गिरफ्तार कर्या है। मिलिट्री इन्टीलीजेंस री जाणकारी माथे पकड़ी ज्यी बबीता धाकड़ उर्फ खदीजा नाम री आ महिला

सवाईमाधोपुर जिला री मूल रहवासी है। शुरुआती जाणकारी मुजब आ लाम्बा बगत ऊँ देश विरोधी नेटवर्क सारू काम कर री ही। पुलिस अधीक्षक मनीष त्रिपाठी बतायो के यूएपीए एक्ट रे तैत गिरफ्तार कर ने आरोपी महिला ने अदालत मांय पेश करी ज्या जठे ऊँ उण ने 27 जून ताई रिमाण्ड माथे भेज दीरीज्या है।

000

संसदीय कार्यमंत्री जोगाराम पटेल अर गृहराज्य मंत्री जवाहर सिंह बेढम आज जयपुर मांय समान नागरिक संहिता-यूसीसी ने ले र प्रेसवार्ता करी। श्री पटेल कह्यो के इण ऊँ समानता री भावना ने बधावो मिलेला साथै ई भेदभाव ने कम करण मांय मदद मिलेला। राज्य सरकार यूसीसी लागू करण कदम बढ़ावता विधेयक लावण सारू ऊँचा थर री कमेटी बणायी है।

.....

श्री बेढम कह्यो के यूसीसी संविधान मुजब है। आ लैगिंग समानता कानी ई अहम है।

000

चिकित्सा मंत्री गजेन्द्र सिंह खींवर कह्यो है कि जोधपुर रा पावटा सेटेलाईट अस्पताल मांय प्रसूतावां रा इलाज मांय पूरी सावचेती बरती जाय री है। विशेषज्ञा री देखरेख मांय वां रो ईलाज कर्यो जावे। मीडियां साथे बतळ मांय चिकित्सा मंत्री कह्यो के कोटा, बीकानेर अर जोधपुर रा मामला न्यारा-न्यारा है इण ने एक दूजा ऊँ जोड ने नी देख्यो जावणो चाहिजे।

.....

प्रसूतावां रा स्वास्थ्य ने ले र जिला कलेक्टर आलोक रंजन मेडिकल कॉलेज रा प्राचार्य डॉ. बी.एस. जोधा अर दूजा डॉक्टरां रे साथै मीटिंग करी। मामला री जांच सारू कमेटी बणायी ज्यी है।

000

शिक्षा मंत्री मदन दिलावर आज आप रा रहवास माथे जनसुणवाई करी ई दौरान वणा लोगां री फरियादां सुणी अर वाजिब निपटारां रो भरोसो दियो। मीडियां ऊँ बतळ मांय श्री दिलावर कह्यो के नुवा शिक्षण सत्र सारू जरूरी तैयारियां करी जावे। वणा कह्यो के जुलाई रा पहला हफ़ता ताई सगळा स्कूलां मांय शिक्षक लगावण री कोशिश करी जायेला।

000

राजस्थान माध्यमिक शिक्षा बोर्ड रा नुवां अध्यक्ष हनुमान सिंह राठौड़ अध्यक्ष रा रूप मांय आप रो ओहदो संभाळ लियो। वणा बोर्ड रा 41 वां मुखिया रा रूप मांय कमान संभाळी। बोर्ड प्रशासक शक्ति सिंह राठौड़ वां ने काम संप्यो। श्री राठौड़ बतळ मांय मीडियां ने पढेसरा संपूरण विकास सारू नुवी शिक्षा नीति ने वाजिप लागू करण ज़ोर देवण री बात कही।

.....

राजस्थान लोक सेवा आयोग मांय सदस्य ओहदा माथे नियुक्त व्ह्या डॉ. संतोष आनन्द निष्पक्ष परीक्षण ने पैली प्राथमिकता बताया। श्री आनन्द अबार भीलवाड़ा रा माणिक्य लाल वर्मा राजकीय कॉलेज रा प्राचार्य रा रूप मांय काम कर रह्या है। खबरनवीसां सागे बात करता वणा कह्यो के बेगा ई वे आरपीएससी सदस्य रा रूप मांय ओहदो संभाळेला।

000

बीएसएफ रा महानिरीक्षक एम.एल. गर्ग आज राज्य रा मुख्य सचिव वी. श्रीनिवास ऊँ मिल्यां। ई दौरान अतिरिक्त मुख्य सचिव भास्कर ए सांवत ई मौजूर रिया। मुलाकात मांय न्यारा-न्यारा मुद्दा माथे चर्चा करी ज्यी।

000

सीकर जिले रा रामगढ़ सेठान हलका मांय आज संवारा एक सड़क हादसा मांय दो लोगां री मौत व्हे ग्यी। वठे ई एक दूजो घायल व्हे ग्यो। रामगढ़ सेठान थानाधिकारी प्रकाशचन्द्र बतायो के हादसो सड़क किनारे खड्या ट्रौला अर रफ्तार ट्रेलर रे बीचे टक्कर ऊँ व्ही। घायल ने चूरू रैफर करी ज्या है। उठिने श्रीगंगानगर रा सत्यम नगर मांय एक नुवा बण रिया भवन मांय करंट लागण ऊँ दो मजूरां री मौत व्हे ग्यी।

000

राज्य मांय लारला कुछ दिनां ऊँ चाल री प्री-मॉनसून गतिविधियां लोगां ने हीटवेब अर करड़ी गर्मी ऊँ आराम देय री है। एक रे पछे एक बरोबर सकिय व्हे रिया आतूणी विक्षोभ ऊँ केई जिलां मांय आंधी बिरखा रो दौर बण्योड़ो है। आज ई प्रदेश रा केई हलकां मांय मौसम रो मिजाज बदल्या रहवण रा आसार है। मौसम मेहकमां मुजब आंधी-बारिश की ये गतिविधियां जयपुर, अजमेर और भरतपुर संभाग

मांय 26 जून तांई बणी रहवण री आस है। ई दौरान कटेई—कटेई धूळभरी आंधी ई चाल सके है। दूजी कानी बीकानेर अर जोधपुर संभाग मांय मौसम साफ रहवण री आस है। फ़ैरू ई कुछ ठौड़ा बादळ छाया रह सके है।